

Na osnovu člana 12. stav (7) Zakona o sistemu državne pomoći u Bosni i Hercegovini ("Službeni glasnik BiH", broj 10/12) i člana 193. Zakona o upravnom postupku ("Službeni glasnik BiH", br. 29/02, 12/04, 88/07, 93/09 i 41/13), rješavajući u postupku ocjene usklađenosti državne pomoći s propisima o državnoj pomoći, pokrenutom na osnovu Zahtjeva Federalnog ministarstva prometa i komunikacija za odobrenje državne pomoći korisniku Javno preduzeće "Radio-televizija Federacije Bosne i Hercegovine" Sarajevo za tehničko opremanje, Vijeće za državnu pomoć Bosne i Hercegovine na 39. sjednici, održanoj 26. januara 2016. godine, donijelo je sljedeće

### RJEŠENJE

1. Odobrava se *ex post* državna pomoć koja je dodijeljena korisniku Javno preduzeće "Radio-televizija Federacije Bosne i Hercegovine" Sarajevo u obliku subvencije u iznosu od 382.000,00 KM, jer je u skladu sa Zakonom o sistemu državne pomoći u Bosni i Hercegovini.
2. Federalno ministarstvo prometa i komunikacija, kao davalac državne pomoći, dužno je u pisanoj formi obavijestiti korisnika o tome da mu dodjeljuje *de minimis* državnu pomoć, kao i o iznosu pomoći koju dodjeljuje, te zatražiti od korisnika da ga u pisanoj formi obavijesti o svakoj drugoj *de minimis* državnoj pomoći koju je dobio u prethodnom trogodišnjem fiskalnom periodu.
3. Federalno ministarstvo prometa i komunikacija, koje dodjeljuje *de minimis* državnu pomoć, dužno je u roku od 15 dana od dana dodjele dostaviti Vijeću za državnu pomoć Bosne i Hercegovine kopiju dokumenta o dodjeli te pomoći.
4. Ovo rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

### Obrazloženje

#### 1. Zahtjev za pokretanje postupka

Vijeće za državnu pomoć Bosne i Hercegovine (u daljnjem tekstu: Vijeće) zaprimilo je 21.12.2015. godine, pod brojem: UP/I 03-26-1-34/15, Zahtjev Federalnog ministarstva prometa i komunikacija, akt broj: 04-49-2417/15, od 4.12.2015. godine, za odobrenje državne pomoći korisniku Javno preduzeće "Radio-televizija Federacije Bosne i Hercegovine" Sarajevo (u daljnjem tekstu: RTVFBiH) za tehničko opremanje u obliku subvencije u iznosu od 382.000,00 KM. Uz Zahtjev podnosilac je dostavio:

- popunjen obrazac za prijavljivanje programa državne pomoći u Federaciji Bosne i Hercegovine (u daljnjem tekstu: obrazac prijave),
- Dopis RTVFBiH, broj: 4110-01/552, od 3.9.2015. godine,
- Izjavu s brojem zaposlenih na kraju 2014. godine, broj: 4110/1-15/345, od 31.8.2015. godine,
- Program utroška sredstava tekućeg transfera, broj: 4110-01/729, od 28.10.2015. godine (u daljnjem tekstu: Program broj: 4110-01/729),
- Obavještenje o razvrstavanju pravnog lica prema klasifikaciji djelatnosti, broj: 07-32.5-17589/12, od 16.2.2012. godine,
- Bilans stanja RTVFBiH na dan 31.12.2014. godine,
- Bilans uspjeha RTVFBiH za period od 1.1.2014. do 31.12.2014. godine,
- Aneks - Dodatni računovodstveni izvještaj RTVFBiH od 1.1.2014. do 31.12.2014. godine.

U smislu člana 14. stav (1) Zakona o sistemu državne pomoći u Bosni i Hercegovini (u daljnjem tekstu: Zakon), Federalno ministarstvo finansija je svojim aktom dalo konsultativno mišljenje, broj: 06-14-3-7831/15, od 11.12.2015.

godine, na prijavu državne pomoći od Federalnog ministarstva prometa i komunikacija za dodjelu subvencije RTVFBiH, te uz to mišljenje dostavilo Vijeću navedene priloge i obrazac prijave, shodno odredbi člana 12. stav (2) Zakona.

Uvidom u podneseni zahtjev, Vijeće je utvrdilo da isti nije kompletan, odnosno da ne sadrži sve dokumente neophodne za njegovu ocjenu i donošenje odluke iz člana 12. stav (3) Zakona, te je zatražilo od Federalnog ministarstva prometa i komunikacija dopunu prijave državne pomoći aktom broj: UP/I 03-26-1-34-1/15, od 30.12.2015. godine.

Podnosilac Zahtjeva je 12.1.2016. godine Vijeću dostavio dopunu dokumentacije za prijavu državne pomoći, akt broj: 04-49-2417-2/15, od 7.1.2016. godine, u prilogu koje je dostavljen sljedeći dokument:

- Odluka Vlade Federacije BiH o usvajanju Programa utroška sredstava tekućeg transfera "Subvencije javnim preduzećima - Subvencija za RTVFBiH/podrška Vlade Federacije Bosne i Hercegovine za tehničko opremanje" utvrđenih Budžetom Federacije Bosne i Hercegovine za 2015. godinu Federalnom ministarstvu prometa i komunikacija ("Službene novine Federacije BiH", broj 98/15) (u daljnjem tekstu: Odluka Vlade Federacije BiH o usvajanju Programa utroška sredstava).

Federalno ministarstvo prometa i komunikacija je u svrhu dopune prijave državne pomoći putem elektronske pošte 11.1.2016. godine Vijeću dostavilo Ugovor o prijenosu sredstava i izvještavanju o utrošenim sredstvima, broj: 07-49-1235-2/15, zaključen 29.12.2015. godine između Federalnog ministarstva prometa i komunikacija i RTVFBiH (u daljnjem tekstu: Ugovor o prijenosu sredstava).

#### 2. Primijenjeni propisi

Osim Zakona, Vijeće je u postupku primijenilo odredbe čl. od 68. do 70. Uredbe o namjeni, kriterijima i uslovima za dodjelu državne pomoći u Federaciji BiH ("Službene novine FBiH", broj 99/13) (u daljnjem tekstu: Uredba) koje se odnose na *de minimis* državnu pomoć.

#### 3. Utvrđivanje činjenica

Na osnovu dostavljenih podataka Vijeće je u postupku utvrdilo sljedeće:

Pravni osnov za dodjelu državne pomoći RTVFBiH u obliku subvencije u iznosu od 382.000,00 KM za tehničko opremanje sadržan je u Odluci Vlade Federacije BiH o usvajanju Programa utroška sredstava.

U skladu s tačkom II. navedene odluke, Vlada Federacije BiH obavezala se da će putem Federalnog ministarstva prometa i komunikacija dodijeliti RTVFBiH sredstva u iznosu od 382.000,00 KM za stvaranje uslova za uvođenje DVBT-a u Bosni i Hercegovini (digitalne televizije) kroz poboljšanje tehničkog kvaliteta programa i emitiranja u 2015. godini za sljedeću namjenu:

- Izrada nove mrežne infrastrukture unutar RTVFBiH sa osnovom baziranom na optičkom povezivanju unutar prostora RTVFBiH (LAN) i ka vani (WAN);
- Nabavka opreme za emitiranje programa bez trake PLAYOUT HD/SD standard;
- Nabavka 2 IP mobilna linka s prijemnom stanicom;
- Nabavka ENG/EFP opreme za informativni program.

Tačkom III. Odluke Vlade Federacije BiH o usvajanju Programa utroška sredstava propisano je da će po njenom usvajanju Federalno ministarstvo prometa i komunikacija zaključiti Ugovor s RTVFBiH kojim će se urediti prijenos sredstava i izvještavanje o utrošenim sredstvima.

